

## Rau Ite Inim Ru To Paulus Imbooda Ila To Yesu Korin 2 Korin—2 Corinthians

<sup>1</sup> You Paulus. Maaron itaghon tau lolo ve ighur ghou nanim mbanjoona to Yesu Krisi. Yeru tonjetaz toit Timoti, nimbood rau tonene ilat to yam to aneep ila lupuun to Maaron izi ndug Korin. Ve yam moghon maau. Rau tonene ilup gham toman Maaron tamtoghon toni patabuana tisob to tineep irau taan suruvu to Akaia ne paam.

<sup>2</sup> Poia to Tamaan Maaron ve Tiina toit Yesu Krisi iza tiam, ve tingin gham aneep pool toman lolomim luuma. Onoon.

*Maaron iuluul ghiit pa patanani toit, lesu tauul nditaad pa patanani todi*

<sup>3</sup> Lolood poia pa Tiina toit Yesu Krisi Tama Maaron, ve tapaiti pa poia toni. Pasa, ye lolo isamin ghiit ve iuluul ghiit. Ye Maaron to irabrab ateed ve ipapalot ghiit irau sawa isob. *Ep 1:3; 1Pe 1:3*

<sup>4</sup> Sawa isob to iit taneep ila patanani lolo, ye irabrab ateed ve ipapalot ghiit. Leso anaad tapalot nditaad pida to tineep ila patanani lolo, ve tarab atedi. Pasa, ulaan to taghamghami ila toni, nene ipapalot ghiit. Tauto iit irau tarab nditaad atedi ve tapalot di. *Ro 15:5; 2Kor 7:6*

<sup>5</sup> Onoon, iit to tataghon Krisi, tambaad patanani naol tanimale ye tau. Eemoghon ighaze tambaad patanani tintina, nene pale ye tau irab ateed, ve

tagham palotiinj tiina ila toni. *Mbo 94:19; 2Kor 4:10; Kol 1:24*

<sup>6</sup> Sawa to yei nimbaad patañani, nene pa ipalot gham, leso ayoon ariña pa taghoniinj ataam to Maaron ve igham mulin gham. Pasa, ighaze Maaron ipalot ghei ve niyoon ariña, nene pale ngar to nighami, ipalot gham paam ve ayoon ariña pa badoon patañani animale yei. *2Tim 2:10*

<sup>7</sup> Tovenen yei nighur ila ariña nighaze: Yam pale ayoon ariña. Pasa, yei niwatag: Ighaze itinja talup ghiit pa badoon patañani, nene pale Maaron irab ateed ve itinja tagham palotiinj ila toni. *Ro 8:17*

*Paulus ipaesia patañani to ivot pani izi taan suruvu to Asia*

<sup>8</sup> Yam tonjvetaz, yei nighaze yam awatag patañani to ivot payei izi taan suruvu to Asia. Patañani to ivot payei, nene tiina kat. Irau nimbaada maau. Tovenen sawa tonenen, nigham ngar nighaze irau nineep maau, pale nimaat. *Mbanj 19:23+; 1Kor 15:32*

<sup>9</sup> Onoon kat. Sawa tonenen, nighita nighaze lemai ataam eta muul maau. Yei ninimale ngeu to tingabiiz saveej toni ve tighaze ye pale imaat. Eemoghon patañani tonowen ivot payei, leso ninumeer taumai sob, ve ninumeer Maaron. Pasa, ye moghon irau ipamundigin yes mateeja.

<sup>10</sup> Tovenen patañani tiina to ivot payei, nene ini-male yei nineep ila naal avo. Eemoghon Maaron igham mulin ghei pa patañani tonowen. Tauto nighur ila ariña nighaze muri, ighaze patañani ivot payei muul, ye pale igham mulin ghei. *Ro 8:35+*

<sup>11</sup> Eemoghon yam irau auul ghei ve aghur ghei ila sunjuun tiam. Ighaze agham tovene, Maaron pale iloon sunjuun tiam, ve iuul ghei itaghon tau poia toni. Leso yamña ival tiina lolomim poia pani, ve apaiti. *Ro 15:30+; 2Kor 4:15; Pil 1:19*

*Paulus ipaesia pughu tau itoor ngar toni ve ila Korin maau*

<sup>12</sup> Mbeb tiina eez to yei nipakur ghei pani, nene vene: Niyamaan taumai nighaze: Ngar to nighamghami irau ndug ndug, yei nitaghon ngar to tamtoghon to taan tipaiti ne maau. Poia to Maaron, tauto ipamundigin ghei ve nimbessmbees pani toman lolomai ee moghon, ve nighamgham ngar to ingalaan ila ye mata. Ve ngar tonene, yei nipatoon katini payam. *1Kor 1:17, 2:4,13; 2Kor 2:17; 1Tes 2:10*

<sup>13-14</sup> Ve saveen to nimbooda payam ne, pughu eta iyoon maau. Saveen tiei isob, ngara ineep ghazona. Irau awaata moghon ve aghazon pani. Onoon, sawa tonene, yam pida avaat aghazon payei kat sone. Eemoghon naghaze le ngar tiam ivot ve aghazon kat payei. Leso sawa to Tiina toit Yesu imuul inim, tinimim iza payei, inimale yei tinimai iza payam. *2Kor 5:12; Pil 2:16; 1Tes 2:19*

<sup>15-16</sup> Muun, naghita naghaze yam tinimim iza payou ve uraat tiou. Tauto sawa tonenen, matag ingal naghaze nalat naghita gham muun. Le isob, ghoron nala taan suruvu to Masedonia. Ve sawa to napul Masedonia, ghoron namuul nalat naghita gham muul, ve aghur ghou malmalig nala pa Yudea. Leso Maaron ipalot gham pae ru itaghon laghoon ru to naghami ne. *Mban 19:21; 1Kor 16:5+*

17 Eemoghon ngar tiou tonenen ighur maau. Onoon muun, you nasaav payam naghaze: “You pale nalat.” Eemoghon muri, nator alinag naghaze irau nalat maau. Ve yam aghita ghou vena? Aghaze you nagharaat poian ngar tiou maau, tauto natortoor alinag? Ma aghaze naghama kaarom ve nambua sorokin saveen nanimale yes to titaghon ngar to taan, tauto saveen ru “Vee” ve “Maau” ivotvot ila avog, ne? <sup>18</sup> Alooŋ. Maaron toit, ye isasavia saveen onoon moghon, ve itataghon saveen toni irau sawa isob. Ve yei tovene paam. Irau nitortoor alinamai maau. *1Kor 1:9; 1Tes 5:24*

19 Pasa, Maaron Natu Yesu Kriisi to yeru Silas ve Timoti nivotia varu payam, ye itortoor alina maau. Ighaze ye imbua saveen pa mbeb eta ighaze: “Vee, pale naghama,” nene irau itoor alina muul maau. Sawa isob, ye itataghon saveen toni. Ve ila uraat toni, Maaron isaav “Vee” pa saveen mbuaan toni to naol ne. *Mban 18:5*

20 Pasa, sa saveen to Maaron imbua, nene Kriisi to ighama uraata ve anona ivot. Tauto moghon moghon ighaze tapait Maaron iza pa tapiri ve poia toni, iit tasavsaav taghaze: “Onoon” ila Yesu Kriisi iza. *Ro 15:8+; Syg 3:14*

21-22 Maaron tau ipapalot ghei toman gham. Tauto iit tasob taneep tunia ila to Kriisi. Ye isia ghiit tanim le, ve ighur Avuvu Patabuan ila lolood wa. Avuvu tonene inim ghilalooŋ pait ighaze iit tamtoghon to Maaron. Ve inim pughu pa mbeb naol to pale Maaron ighama di pait. Tovenen iit tawatag: Sa mbeb to Maaron imbua saveen pani, ye pale ighama pait. *Ro 8:16+; 2Kor 5:5; Ep 1:13+*

<sup>23</sup> Ila Maaron mata, saveen to naghaze nasavia,

nene onoon. Pughu to nalat maau, nene vene: You lolog pa nasavia saveen ariana payam, ve naghham gham lolomim isami malep. <sup>24</sup> Alooŋ. Yei nighaze nitatan gham azi, ve niŋgin ghurla tiam ne maau. Yei niwatag: Yam ayoon ariana pa ghurla tiam wa. Yei nighaze itina talup ghiit ve tagham uraat. Leso niuul gham ve aneep toman lolomim poia. *1Pe 5:3*

## 2

<sup>1</sup> Pughu to nalat maau, nene vene: Papazogi to nalat tiam, naghham saveen ariana payam, ve igham lolomim isami. Ve ŋgar tiou iyaryaen naghaze ŋgar tovene ivot muul malep. Tauto nalat maau. <sup>2</sup> Pasa, ighaze naghham lolomim isami, nene pale sei masin tigham ghou lolog poia? Maau. Pasa, yam to nawaghmun lolomim, yam moghon to irau agham ghou lolog poia. <sup>3</sup> Tauto nalat maau, ve nambood rau ilat pa napasalungan gham. Pasa namatughez: Ighaze patanani inepneep sosood ve nalat, nene pale agham lolog isami. Eemoghon you naghaze le yam agham ghou lolog poia. Ve you naghur ila tovene: Ighaze ataghon ŋgar to igham ghou lolog poia, nene pale yam asob lolomim poia paam. <sup>4</sup> Rau ariana tonanan, matag suru izizi ve nambooda. Pasa, naghham ŋgar naol payam, ve lolog ipatanan kat. You nambood rau tonanan pa naghham gham lolomim isami maau. Nambooda ilat tiam, lesa aghilaal aghaze lolog payam kat. *Mban 20:31; 2Kor 7:8+*

*Yes Korin irau tipul sosor to ŋgeu to igham sosor*

<sup>5</sup> Ŋgeu to muun igham ghou lolog ipatanan, ye igham sosor payou moghon maau. Ye igham

gham asob lolomim ipatañan paam. Eemoghon irau avog ila pa mbeb tonenen kat maau. Pa vene, naghham ngeu tonenen lolo isami. *1Kor 5:1+*

<sup>6</sup> Patañani to yam ival aghuri pani pa aňgal mata, nene iraua. <sup>7</sup> Tovenen aazne, yam irau apul sosor toni, ve arab ate ve apaloti. Pa vene, lolo isami le isami kat, ve patañani tonenen itatani. *Lu 17:3*

<sup>8</sup> Tovenen you naghaze napalot gham pa apatoon ngar poia pani, lesu iwatag ighaze yam lolomim pani.

<sup>9</sup> Pughu to nambood rau ariaña tonanan payam, nene vene: Naghaze natoov gham ve naghita: Pale ataghon aliñag pa ngar to naol ne, ma maau?

<sup>10</sup> Ve yam aloon aliñag ve aghur atia pa ngeu tonanan wa. Tovenen aazne, yam irau lolomim isamini ve apul sosor toni. Ve ighaze yam apul sosor to tamtoghon eta, nene you paam, pale napul sosor toni. Sa sosor to ye igham payou, ila Krisi mata, you napul sosor toni. Nene poia pa naghham tovene, lesu nauul gham. <sup>11</sup> Tovenen iit irau tapul sosor toni. Pa vene, Sadan itombaan ghiit ve ilib pait. Eemoghon iit takankaan pa Sadan ngar toni maau. Ataam naol to ye itovtoov ghiit pani, iit tawatag di wa. *Lu 22:31+*

### *Uraat tau to yes mbanjoonja*

<sup>12</sup> Sawa to nala navot ndug Troas pa navotia varu poia to Krisi padi, naghita naghaze Tiina toit ikaak ataam payou pa naghham uraat izi tonowe.

<sup>13</sup> Eemoghon lolog ipatañan, ve naghham ngar naol. Pasa, naghaze pa naghita itag ite Titus tonowe. Eemoghon maau. Tovenen yeiña yes Troasa nikis nimamai le isob, ghoru napul di, ve namundig

nala pa taan suruvu to Masedonia. Leso nakaal Titus izi tonowe. *2Kor 7:5-7*

<sup>14</sup>Ve you napait Maaron toman lolog poia. Pasa, sawa isob, ye imuun payei ve ipapalot ghei pa uraat tiei. Ila uraat to Krisi, yei ninimale yes to tilaagh toman daba to ndaaba to iparab ariana ve ilib pa malmal tiina.\*

Uraat tiei, nene ataam to Maaron ipaghazonan tamtoghon pa Krisi varu. Varu tonowen, nene inimale naunaun poia to vuzi ila irau ndug. <sup>15</sup>Onoon kat. Yei uraata to Krisi ninimale naunaun vuzi poia to ye igham pa Maaron inimale watoonrau. Tamtoghon to nineep ila lolodi ne, tisob tiyaaz naunaun tonene vuzi. Yes to Maaron ighamgham uraat padi pa igham mulin di, ve yes to titaghon ataam to pale igham di tilaledi ne paam. <sup>16</sup>Yes to pale tilaledi, tiyaaz naunaun tonene vuzi poia maau, inimale mateenja vuzidi. Ve naunaun tonene pale inim pughu pa timaat ve tilaledi. Ve yes to titaghon ataam to nepoon poia, tiyaaz nau-naun tonene vuzi inimale mbeb poia kat. Pasa, ipatoon di pa ataam to tigham nepoon poia ila to Maaron. Uraat to Maaron ighuri inim nimamai, nene patanani. Sei iraua? *1Kor 1:18; 2Kor 4:3; 1Pe 2:7+*

<sup>17</sup>Tamtoghon katindi tilaghlaagh ve tivovotia Maaron aliya inim ataam pa tiyou yaam to tamtoghon. Eemoghon yei nineep ila to Krisi, ve Maaron tau ighur ghei pa uraat. Ve yei niwatag

---

\* **2:14:** Ighaze ndaaba to Rom tilib pa malmal tiina eta, nene tighereb koiadi pida ve yesja timuul tila pa ndug tiina Rom. Ghoron daaba tonowen toman daba todi tilaagh ila ndug lolo toman koiadi tonowen, ve ival tiina tighereb di ve tipakur di.

Maaron ighitghita uraat tiei. Tauto nighamgham uraat toman lolomai, ve nivovotia Maaron aliņa denja pa tamtoghon. *2Kor 1:12, 4:2; 1Tes 2:5; 1Tim 6:5*

### 3

*Uraat to Paulus ipatoonja ighaze ye mbanjoonja to Kriši*

<sup>1</sup> Vena, saveeņ tiei tonene, yei nisavia pa nipait taumai muul, leso aghur ila uraat tiei? Maau. Onoon, tamtoghon pida tikis ledi rau to ipatoon di ighaze izadi pa uraat todi. Eemoghon yei lemāi pughu eta pa nipatoon rau tovene payam, ma nighason gham pa ambood rau tovene payei ne maau. *2Kor 5:12, 10:12*

<sup>2</sup> Pasa, yam taumim to anim rau payei. Uraat to nighami ila lolomim ve anoņa ivot, tauto ipatoon ghei ighaze izamai pa uraat to nighamghami. Saveeņ isob to rau tonenen ineep ila yei lolomai ve ineep ila yam lolomim paam. Rau tonenen, tamtoghon tisob irau tiwaata ve tigham ņgar pani, leso tighur ila saveeņ tiei. *1Kor 9:2*

<sup>3</sup> Tovenen yam taumim animale rau to Kriši to ineep ghazoonja. Rau tonenen, nene uraat to nighami ila lolomim ne anoņa toni. Kriši imbooda pa mbeb eta inimale gabgab maau. Imbooda pa Maaron mata yaryaara Avuvu. Ve imbooda ila yaam babaņadi inimale Maaron igham pa tutuun to Mose ne maau. Ye imbooda ila tamtoghon lolodi. *Igham 24:12; Yer 31:33; Ezek 36:27; 1Kor 3:5+; Hib 8:10*

<sup>4</sup> Ila Maaron mata, yei nighur ila ariņa nighaze saveeņ tonene, nene onoon. Pasa, Kriši ineep



toman ghei pa uraat tiei. <sup>5</sup> Eemoghon yei irau ni-pait taumai maau. Pasa, irau nigham uraat tovene ila taumai tapirimai maau. Maaron ipapalot ghei, tauto niraua. *Yo 15:5; 1Kor 15:10; Pil 2:13*

<sup>6</sup> Tovenen Maaron tau igham ghei nirau uraat toni, ve ighur ghei ninim mbesoonja pa ataam paghu to yesna tamtoghon toni tilup di tinim ee moghon. Ataam tonene, nene ataam to taghoniin tutuun to timbooda ne maau. Nene ataam to Maaron Avuvu to itortoor ghiit tanim paghu. Pasa, tutuun to timbooda, nene igham ghiit tamaat. Ve Maaron Avuvu, ye igham ghiit taneep poia ila to Maaron. *Yo 6:63; Ro 7:6; Ga 3:10+; Hib 8:6+*

*Ataam paghu to Krisi ilib pa ataam mungina to tutuun*

<sup>7</sup> Ataam to muun tamtoghon timbees pa Maaron, nene igham ghiit taneep ila ataam to mateen.\*

Eemoghon sawa to Maaron irab tutuun tonowen ila yaam, ve igham pa yes Israela, nene inim toman nguruba ve tapiri tiina. Tauto yes Israela irau timbatut Mose nagho mala maau. Pasa, nguruba tonowen, tiina kat le ingal matadi. Eemoghon nguruba tonenen ineep ris, ve isob. *Igham 34:1+,28+; Hib 12:18+*

<sup>8</sup> Ve ataam paghu to aazne tambees pa Maaron, nene vene: Maaron Avuvu igham uraat pait ve itoor ghiit tanim paghu. Tovenen ataam tonene

---

\* **3:7:** Ataam mungina to tutuun, nene vene: Ighaze tataghon katin tutuun tisob to Maaron, nene pale taneep pooi. Ve ighaze maau, nene pale mbalmbali to Maaron iza toit.

nguruba ve tapiri tiina kat ilib pa ataam munjina.  
*Ro 7:6; Ga 3:2-5*

<sup>9</sup> Ataam paghu, nene nguruba ve tapiri tiina kat ilib pa ataam munjina. Onoon, ataam munjina inim toman nguruba ve tapiri tiina. Eemoghon ataam tonowen isaav pait tovene: Iit pale tamaat pa sosor toit. Ve ataam paghu to aazne tataghoni, nene igham ghiit taneep denjaad ila Maaron mata.  
*Ezek 18:4; Ro 3:21+, 8:1+*

<sup>10</sup> Onoon, ataam munjina inim toman nguruba ve tapiri tiina. Eemoghon ighaze taghazonj pa ataam paghu ngara, nene pale taghita taghaze ataam munjina, nguruba ve tapiri kat maau. Pasa, ataam paghu nguruba, nene tiina kat ilib pa ataam munjina. <sup>11</sup> Sawa to Maaron ivotia ataam munjina to tutuun, nene inim toman nguruba ve tapiri. Eemoghon ataam tonowen irau ineep itaghoni gha ila ne maau. Pale isob. Ve ataam paghu tonene irau isob maau. Pale ineep tovene itaghoni taghoni gha ila. Tovenen ye nguruba ve tapiri tiina kat.  
*Ro 10:4; Hib 7:18, 8:13*

<sup>12</sup> Yei nighur ila ariana tovene, tauto nimatughez maau, ve nisavsaav ghazonja pa tamtoghon.  
*Mbanj 4:13; Ep 6:19; Pil 1:20*

<sup>13</sup> Yei ninimale Mose maau. Aghita. Muun, ye iponpoon nagho pa uli pida. Leso yes Israela timbatut nagho to isul ne sob. Pasa, nguruba tonowen ineep mala maau. Ineep ris, ve isob.  
*Igham 34:33+*

<sup>14</sup> Eemoghon yes Israela ngar todi iyaryaan, tauto tighilaal mbeb tonowen pughu maau. Ve aazne paam, ighaze tiwaat saveen to ataam munjina, yes tighilaal pughu maau. Nene inimale uli pida

iponpoon matadi sone. Pasa, Krisi moghon to irau igham uli pida tonowen ighau padi. *Ro 11:7+,25; 2Kor 4:4*

<sup>15</sup> Tauto muuŋ ve inim aazne, ighaze yes Israela tiwaat saveeŋ to Mose, yes tighilaal pughu maau. Nene inimale mbef eta iponpoon lolodi ve ngar todi. <sup>16</sup> Eemoghon ighaze tamtoghon eta itoor ngar toni, ve ighur ila to Tiina toit, nene pale Krisi igham mbef tonenen ighau pani.

<sup>17</sup> Tiina to nasavia ne, nene Maaron Avuvu. Ighaze ye inepneep toman ghiit, ye pale ipas ghiit tavot pa samia tapiri. Leso tanim mbesooŋa sorok muul sob. *Yo 8:32,36; Ro 8:2,15; Ga 4:6+, 5:1*

<sup>18</sup> Aazne, iit taghazoŋ pa Maaron. Mbef eta ipoon mataad muul maau. Pasa, iit tasob taghita Ngeu Tiina nguruba toman tapiri ve poia toni ila to Krisi. Ye ipatoŋ Ngeu Tiina nagho pait inimale taghita Ngeu Tiina anunu ila tiroŋ. Tovenen mataad ilala pani, ve Tiina toit Avuvu itortoor ghiit. Leso tagham nagho, ve anaad tapatoŋ nguruba toman tapiri ve poia toni pa tamtoghon. *Yo 1:14; Ro 8:29; 1Kor 15:49; 2Kor 4:6*

## 4

### *Maaron igham ghazoŋa toni isul ila lolood*

<sup>1</sup> Maaron lolo isamin ghei ve ireu sosor tiei, ve ighur uraat tonene inim nimamai itaghon tau poia toni. Tovenen pataŋani naol to nimbadaad di ne, nene irau titatan ghei ve tigham ghei nipul uraat tiei tonene maau. *1Kor 15:10; 2Kor 3:6; 1Tim 1:12+*

<sup>2</sup> Ngar mayanjiŋa naol to tamtoghon tighamgham di inimale yonŋaan, yei nighur murimai padi wa.

Ngar to yei nighamghami ne, kaarom eta ineep ila lolo maau. Ve niwatoran Maaron aliņa maau. Nisavia denja moghon. Pasa, yei niwatag: Maaron ighita uraat tiei. Tauto nivovotia saveeņ onoon moghon pa tamtoghon, ve nisaav kat padi. Leso tighilaal ila lolodi tighaze yei izamai pa uraat tonene. *2Kor 2:17, 5:11; 1Tes 2:3+*

<sup>3</sup> Onoon, tamtoghon pida, nene inimale mbep eta ipoon lolodi ve ngar todi. Tauto sawa to nivotia varu poia padi, tigham ngar pani maau. Tamtoghon tovene titaghon ataam to pale igham di tilaledi. *1Kor 1:18, 2:14*

<sup>4</sup> Varu poia isavia Kriši nğuruba toman tapiri ve poia toni. Ve ipaghazonani ighaze ye ngeu to ipatoon katin Maaron nagho pait. Eemoghon yes to tighur ila maau, tighilaal ghazona to varu poia maau. Pasa, Sadan to maaron kaarom to taan tonene, ye ipoon ngar todi wa. *Yo 1:14, 12:31, 14:9; Ep 2:2; Pil 2:6; Kol 1:15; Hib 1:3*

<sup>5</sup> Sawa to nivotia mos, yei nisavsav pa taumai maau. Nisavsav pa tamtoghon nighaze: “Yesu Kriši, ye Tiina toit. Ve yei mbesoņa tiam. Ye tau imbaan ghei ninim pa niuul gham.” *Mban 2:36; 1Kor 3:5; 2Kor 1:24*

<sup>6</sup> Muuņ kat, Maaron isaav ighaze: “Ghazona ivot ve isul ila ndoroom lolo!” Ve ye igham ghazona toni isul ila yei lolomai paam. Leso nighilaal nğuruba toman tapiri ve poia toni to Kriši ipatoona pait. *Mbnp 1:3; Mt 4:16; Yo 8:12; 1Pe 2:9*

*Yes mbanooņa tinimale uur to tigharaat di pa taan ve tighur mbaliņ popoia ila lolodi*

<sup>7</sup> Yei mbanooņa ninimale uur to tigharaat di pa taan ve tighur mbaliņ popoia ila lolodi. Pasa,

yei tamtoghon sorok to taan, ve tapirimai imbool. Eemoghon Maaron ighur ghazonja toni ve tapiri ila lolomai, ve ighur uraat toni inim nimamai. Leso ipatoon tapiri ila uraat tiei. Tapiri tonowen, tiina le tiina kat. *2Kor 3:5, 12:9*

<sup>8</sup> Onoon, patanani naol naol tighamgham ghei. Eemoghon titatan ghei maau. Moghon moghon ataam ivoolvol payei. Eemoghon lolomai isami maau. Pasa, yei niwatag: Maaron pale igham ataam eta ivot payei. *2Kor 1:8, 7:5*

<sup>9</sup> Tamtoghon tighurghur patanani payei. Eemoghon Maaron ipul ghei maau. Tirab matin ghei le nitap nizi taan. Eemoghon nimundig muul. *Ro 8:35+*

<sup>10</sup> Sawa to nimbaad patanani, nene inimale nila toman Krisi pa mateen toni. Eemoghon ye ipapalot ghei ve niyoon ariana. Tauto nipatoonja nighaze ye ineeep mata iyaryaar. <sup>11</sup> Yei tamtoghon to taan moghon, ve muri pale nimaat. Ve sawa isob to nineep izi taan, ninepneep ila buza mata. Pasa, yei nitaghon Yesu. Eemoghon niyoon ariana pa badoon patanani. Gabuamai tonene ipatoon Yesu ighaze ye ineeep mata iyaryaar.

<sup>12</sup> Tovenen moghon moghon ninepneep ila naal avo. Eemoghon niuluul gham pa agham nepoon poia ila to Maaron.

<sup>13</sup> Maaron aliya to timbooda, isaav ighaze: “You naghur ila to Maaron, tauto nasavia.” Yei tovene paam, nighur ila to Maaron, ve nitaghon ghurla tiei. Tauto nisasavia varu poia pa tamtoghon.

<sup>14</sup> Pasa, yei niwatag: Ngeu to ipamundigin Tiina toit Yesu pa mateen, muri pale ipamundigin ghei paam, raraate inimale igham pa Yesu. Ve ye pale

igham ghiit tala tayoon ila mata, ve ivotia ghiit ighaze: “Aghita. Nene tamtoghon tiou.” *Ro 8:11; 1Kor 6:14; 1Tes 4:14*

<sup>15</sup> Yei niyoon ariana pa badoon patanani tiei to naol ne, lesu niuul gham. Yei nighaze poia to Maaron iza to ival tiina, lesu lolodi poia pani ve tipait iza pa tapiri ve poia toni. *2Kor 1:6; Kol 1:24; 2Tim 2:10*

*Paulus ighamgham ngar pa mbep to pale tineep le alok*

<sup>16</sup> Tovenen patanani naol to nimbadbaad di ne, nene irau titatan ghei ve tigham ghei nipul uraat tiei ne maau. Onoon, anonamai ighaze isami. Eemoghon nene mbep to potla moghon. Ve lolomai, sawa isob Maaron ighamgham uraat payei, lesu itoor ghei ninim paghu. *Is 40:29+; Ep 3:16; Kol 3:10*

<sup>17</sup> Patanani tiei to naol ne, yei nighita di nighaze nene mbep tiina maau. Nene rauraua moghon. Ve mala maau pale tisob. Eemoghon patanani naol tonene pale iuul ghei, lesu izamai tiina izi ndug sambam, ve nineep toman Maaron ila nguruba lolo le alok. Mbep poia to pale ivot payei, nene ilib kat pa patanani tiei to naol. *Ro 8:17+; 1Pe 1:6+*

<sup>18</sup> Tovenen mbep to taghita di pa mataad ne, yei matamai ila padi maau. Matamai ilala pa mbep to irau taghita di maau ve taloon varudi moghon. Pasa, mbep to taghita di pa mataad, pale tineep ris ve tisob. Ve mbep to aazne iit irau taghita di maau, nene pale tineep le alok. *Ro 8:24; 2Kor 5:7; Hib 11:1*

## 5

*Paulus ikausim ighaze n̄eez o igham anoŋa paghu to ndug sambam*

<sup>1</sup> Yei nighita anoŋamai to taan tonene inimale dur sorok to anunumai ineep ilooŋ ila. Ve yei niwatag: Ighaze tireu dur tonene, Maaron pale igham lemai ruum tau to ineep izi sambam. Ruum tonowen, tamtoghon tigharaata pa nimadi maau. Maaron tau igharaata. Ve ruum tonenen pale ineep le alok. *2Kor 4:7*

<sup>2-3</sup> Tovenen aazne, yei nikausim ve nitañ nighaze: “Oyai, n̄eez o nineep ila inamai paghu tonowen?” Inamai tonowen, nene anoŋamai paghu to sambam. Sawa to nilooŋ nila, nene inimale anunumai indudi pa nonogiina paghu. Leso nineep tinimai nginiŋa sob. *Ro 8:23*

<sup>4</sup> Sawa to ninepneep ilooŋ ila dur tiei to taan tonene, lolomai ipataŋan ve nitañtaŋ pa nepooŋ to ndug sambam. Eemoghon lolomai pa nipul anoŋamai to taan tonene maau. Nighaze anoŋamai to taan inepneep tovene, le malmalimai nilooŋ nila anoŋamai paghu to sambam to pale ineep le alok, inimale tandud ghiit pa nonogiina paghu.\* *Ro 8:11; 1Kor 15:53+*

<sup>5</sup> Maaron ighur ghiit pa tagham nepooŋ tovene. Ve igham tau Avuvu pait, inim pughu pa mbeb naol to muri pale igham di pait. *2Kor 1:22; Ep 1:13+*

<sup>6</sup> Tauto sawa isob, yei nimatughez maau, ve niyoon ariana. Onoon sawa to nineep toman

---

\* **5:4:** Saveeŋ waaro tonene ŋgara, tovene: Paulus lolo pa imaas, ve anunu moghon ila ndug sambam maau. Ye ighaze Krisi rikia imuul inim. Leso imaas sob. Igham anoŋa paghu ve malmali ila ndug sambam.

anonaımai to taan, nineep sagan pa Tiina toıt. Eemoghon yei niwatag: Muri pale nila nineep tomani. *Hib 11:13+*

<sup>7</sup> Aazne, taghita katin mbeb eta pa mataad sone. Nepoon toıt to taan, nene tataghon ataam to ghurla. *1Kor 13:12; 2Kor 4:18; Hib 11:1*

<sup>8</sup> Nasaav muul. Yei nimatughez maau ve niyoon ariana. Ve lolomai pa nipul anonaımai to taan tonene, ve nila nineep toman Tiina toıt Yesu izi sambam. Pasa, nene mbeb poia kat ilib pa nepoon tiei to taan. *Pil 1:23*

<sup>9</sup> Tauto ighaze nineep sagan pa Tiina toıt, ma nineep tomani izi ndug toni, nene yei nizuaria ghei nighaze nigham ngar to ye lolo pani. *Kol 1:10; 1Tes 4:1*

<sup>10</sup> Pasa muri, iit tasob pale tayoon ila Krisi mata. Leso ingabiiz ghiit, ve ighur atia pa iit enaena itaghon ngar to taghami izi taan. Ngar popoia, ve ngar samsamia paam. *Mt 25:31+; Mban 17:31; Ro 2:16; Syg 20:12*

*Iit leed uraat pa tauul tamtoghon, lesu yesna Maaron tilup di tinim ee moghon*

<sup>11</sup> Tovenen yei nimatughez pa Ngeu Tiina. Tauto nizuaria ghei nighaze le nigham tamtoghon titoor ngar todi ila pani. Lolomai toman ngar tiei, nene ineep ghazona ila Maaron mata. Ve nighaze yam paam aghazon payei, ve aghilaal ila lolomim aghaze yei nimbesmbees pa Maaron toman lolomai. *Mbo 139:1+; Hib 10:31; Jud 23*

<sup>12</sup> Yam agham ngar pa saveen tiei tonene vena? Aghaze nipait taumai muul, lesu aghur inim tiei aghaze yei izamai pa uraat tiei? Maau. Yei nisavia saveen tonene, lesu tinimim iza pa uraat



to nighami, ve irau apamuul saveen to ndiran pida to tineep toman gham. Ndiran tonanan, tighamgham ngar pa tamtoghon izadi ve tipakur di pa mbeb to uliid moghon. Ve mbeb to lolood, yes tigham ngar pani maau. *2Kor 1:14+*

<sup>13</sup> Tamtoghon pida tighita ghei ninimale borouja, ve tighaze ngar tiei iwaghamgham. Ve pida tighaze ngar tiei denja. Nene poia. Taudi ve tisavsaav! Eemoghon uraat tiei tonene, nighamghami pa nipait Maaron iza ve niuul gham. *1Kor 1:18-25*

<sup>14</sup> Ngar to Krisi to lolo pait kat, nene ighamgham pooz payei ve ipamundigin ghei pa ghamuun uraat toni. Pasa, yei nighur ila nighaze ngeu ee moghon tonowen to igham tamtoghon tisob inadi, ve imaat pa sosor todi. Tauto yes to tila tomani pa mateen toni, tisob tipul nepoon todi munjina wa. *Ro 5:15, 6:11+; 1Tim 2:6*

<sup>15</sup> Krisi imaat pa iit tasob, leso iit tamtoghon to taneep ila toni, tataghon ngar to tauud muul sob, ve tataghon ngar to ye lolo pani. Pasa, ye imaat pa sosor toit ve imundig pa mateen, leso iuul ghiit. *Ro 14:7+; Ga 2:20; 1Pe 4:2*

<sup>16</sup> Tovenen aazne, yei ningabiiz tamtoghon eta itaghon ngar to taan muul maau. Onoon, muun yei ningabiiz Krisi itaghon ngar to taan. Eemoghon aazne, nigham ngar tovene pani muul maau.

<sup>17</sup> Ighaze tamtoghon eta inim Krisi le ve ineep ila toni, nene Maaron igham mbeb paghu ivot. Ngar munjina to tamtoghon tonenen, nene isob, ve ye igham nepoon paghu. *Yo 3:3-7; Ro 6:4; Ga 6:15; Syg 21:4+*

<sup>18</sup> Mbeb tisob tonenen tivot ila to Maaron.

Aghita. Muun, koi ineep ila itiņa Maaron sosood. Eemoghon ila uraat to Krisi, aazne itiņa Maaron talup ghiit tanim ee moghon wa. Ve ye ighur uraat inim nimamai ighaze niuul tamtoghon, lesu yesņa Maaron tilup di tinim ee moghon. *Ro 5:10; Kol 1:20; 1Yo 2:2*

<sup>19</sup> Muun, koi ineep ila iit tamtoghon ve Maaron sosood. Pasa, tamamalaan pa tutuun toni. Eemoghon ila uraat to Krisi, Maaron ireu sosor toit, ve ipasob koi tonowen. Tauto aazne, mata kisin sosor toit muul maau, ve itiņa talup ghiit tanim ee moghon wa. Ve ye ighur saveen toni inim tiei, lesu nivotia pa tamtoghon, ve tiwatag ataam to yesņa Maaron tilup di tinim ee moghon. *Mbo 32:1+; Ro 3:23+; Kol 1:19+*

<sup>20</sup> Tovenen yei nigham Krisi nagho, ve Maaron ivovotia aliņa payam ila avomai. Yei nitaņ roran gham ila Krisi iza nighaze: “Atoor ŋgar tiam ila pa Maaron. Lesu yamņa alup gham anim ee moghon.” <sup>21</sup> Aghita. Krisi, ye le sosor eta maau. Eemoghon Maaron ighur sosor toit iza toni ve imaat inim watoonrau pa ireua. Lesu iit to tanim Krisi le ve taneep ila toni ne, taneep denjaad ila Maaron mata. *Is 53:6+; Ro 5:19; Ga 3:13; Pil 3:9; 1Yo 3:5*

## 6

<sup>1</sup> Yeinja Maaron niluplup ghei pa uraat toni. Tovenen nighaze nipalot gham tovene: Poia to Maaron to iza tiam, nene irau ipamundigin gham pa ataghon Maaron ŋgar toni. Lesu poia toni tonanan anonja ivot. Ighaze maau, nene pale inim mbeb sorok. *2Kor 1:24, 5:20; Hib 12:15*

<sup>2</sup> Maaron aliņa isaav tovene:

“You taug naghur sawa pa naghams mulin gham ve naghams poian gham. Ve sawa kat tonenen, naloon sunjuun tiam, ve nauul gham.” *Is 49:8*

Aloon. Sawa to Maaron ighams mulin ghiit ve ighams poian ghiit, tauto aazne taza pani wa. *Lu 4:18+; Hib 3:13*

*Nepoon to mbesoon tau to Kriisi*

<sup>3</sup> Mbesoon tiei to nighamghami pa Kriisi, yei nighaze nitaghon ngar to denja kat ila tamtoghon matadi. Lolomai pa nighams ngar eta isosor maau. Pa vene, nighams tamtoghon titap pa ghurla todi. *Ro 14:13; 1Kor 8:13, 10:32*

<sup>4</sup> Ngar tiei isob, nene ipatoon ghei ighaze yei mbesoon tau to Maaron. Pasa, patanani naol tighamghams ghei, eemoghon niyoon ariana pa badoon di. Moghon moghon patanani izaza tiei, ve sawa pida, nighita nighaze lemai ataam muul maau. *2Kor 4:9+*

<sup>5</sup> Tamtoghon tiloslos ghei, ve tighurghur ghei niloon nila ruum to yabyabuun, ve nighamghams samia ila malmal. Yei nirab taumai pa uraat to Kriisi le tapirimai isob kat. Ve sawa naol, nigheen pooi maau, ve pitool matmatin ghei.\* *Mbanj 16:23; 2Kor 11:23+*

<sup>6</sup> Yei nitaghon ngar ngalaana moghon ila Maaron mata, ve nighazoon pa ngar toni, ve nighamghams poian tamtoghon. Ve ighaze tighams samin ghei, yei nitatan taumai ve nimbaada moghon. Avuvu

---

\* **6:5:** Ataam ite to tatoon saveen waaro tonene, nene vene: “Sawa naol, yei nigheen pooi maau. Nipamaat ve ningun taumai pa ghaniin aniin, lesa matamai ingal sunjuun.”

Patabuanj inepneep toman ghei, ve nighur lolomai pa tamtoghon kat. *Ro 12:9; 2Kor 4:2; Ga 5:22; Kol 3:12; 1Tim 4:12*

<sup>7</sup> Yei nisasavia saveen onoon moghon, ve Maaron tapiri ipapalot ghei. Mbeb tiei to malmal, nene ngar to denja ila Maaron mata. Ngar tonene inim iiz pa niparab pani, ve inim sigeu pa nipoon tau-mai pani. *1Kor 2:4; 2Kor 10:4*

<sup>8</sup> Sawa to nigham uraat to Maaron, tamtoghon pida tipait izamai, ve pida tiveleg ghei tighaze yei tamtoghon sorok. Tamtoghon pida tipait varumai, ve pida tiwaghamun izamai. Tamtoghon pida tighita ghei tighaze yei mbesoonja tau to Maaron, ve pida tighaze yei nigham kaarom ve nipaghau tamtoghon pa ataam to Maaron. <sup>9</sup> Tamtoghon pida tighazonj payei, ve pida tikankaan payei. Sawa pida, nigham ngar nighaze paam nimaat. Eemoghon nimaat maau. Patanani pida to tivot payei, nene pa ipasalungan ghei. Eemoghon irab ghei nimaat maau. *Mbo 118:18; 2Kor 4:9+*

<sup>10</sup> Onoon, patanani naol to nimbadaad di ne, tigham ghei lolomai ipatanan. Eemoghon Maaron igham ghei lolomai poia irau sawa isob. Yei ndi-ran mbolaanja. Eemoghon niuluul ival tiina le tiraua kat pa mbeb popoia to Maaron. Yei lemai mbeb eta maau. Eemoghon nirau mbeb to naol. *2Kor 7:4, 8:9; Pil 2:17*

### *Paulus ivotia lolo pa yes Korin*

<sup>11-12</sup> O yam Korin, yei lolomai payam kat, tauto nisavia saveen naol tonene payam. Leso awatag katin lolomai. Eemoghon nighita nighaze yam

aponpoon lolomim payei sone. <sup>13</sup> You nasaav payam inimale ndinatug yam: Apoon lolomim payei muul malep. Aghur lolomim payei, inimale yei nighur lolomai payam. *1Kor 4:14*

*Taghur muriid pa ngar samsamia*

<sup>14</sup> Aloonj. Yes to tighur ila to Krisi maau ne, yam ala toman di pa ngar todi malep. Pasa, ngar todi inimale yam maau. Yes to titaghon ngar denja ve yes to timalaan pa Maaron tutuun toni, pale tilup di pa uraat vena? Ghazonja ve ndoroom irau tilup di? Maau. *1Kor 5:9+; Ep 5:6+,11; 1Yo 1:5+*

<sup>15</sup> Ma Krisi yesuru Sadan† tigham ngar raraate? Ighaze tamtoghon eez ighur ila to Krisi, ve ite ighur ila maau, sa mbeb irau ilup yesuru? Maau. *1Kor 10:20+*

<sup>16</sup> Yam awatag: Iit tanim Maaron mata yaryaara rumai toni. Vena, irau talup rumai toni toman rumai to maaron kaaromnja? Maau. Saveenja, Maaron isavia pataghaan wa. Ighaze:

“You pale naneep toman di, ve nalaghlaagh ila lolodi.

Ve you pale nanim Maaron todi, ve yes tinim tamtoghon tiou.” *Wkp 26:12; Ezek 37:27; 1Kor 3:16; Syg 21:3*

<sup>17</sup> Tauto Maaron isaav muul ighaze:

“Apul ndiran samsamiadi tonanan tineep, ve ala aneep sagan padi.

Ve mbeb to ighaze ingalaan maau, yam agharai malep.

Leso naghham gham toman lolog poia. *Wkp 5:2; Is 52:11; Syg 18:4*

---

† **6:15:** Paulus imbood Belial (o Beliar). Belial, nene Sadan iza ite.

<sup>18</sup> ve nanim tamamim, ve yam anim ndinatug ve ndinatug liva.

Saveenj tonene, nene Maaron ariana tau aliņa.” *Ro 8:14; Syg 21:7*

## 7

<sup>1</sup> Yam ndiran tiei, lolomai payam kat. Aghita. Maaron igham leed saveenj mbuaan popoia naol tonene. Tovenen njar tisob to tiwaghamun anonjaad ma anunuud, ve tigham ghiit tasami ila Maaron mata, tapul di tineepledi. Ve tamatughez pa Maaron, ve taghur tauud tanim ye le kat, ve tataghon njar patabuanj moghon inimale ye tau itaghooni. *1Tes 4:7; Hib 10:22; 1Pe 1:15; 1Yo 3:3*

*Paulus lolo poia kat pasa, yes Korin titoor njar todi wa*

<sup>2</sup> Yam tonvetaz, apon lolomim payei muul malep. Akaak lolomim payei lak! Pasa, yei nigham sosor pa tamtoghon eta, ma niwaghamun tamtoghon eta, ma nigham kaarom pa niyub mbep to tamtoghon eta, ne maau. *Mbanj 20:33; 2Kor 6:12+, 12:17*

<sup>3</sup> Saveenj tiou tonene, you nasavia pa nasees matamim maau. Naghaze napasalungan gham moghon. You nasaav payam wa. Lolomai ineep tiam kat. Tovenen ighaze tanepneep, ma tamaat, nene mbep eta irau irab motin lupuuñ toit maau.

<sup>4</sup> You nasaav ghazonja payam. Lolog ru payam maau. You naghita gham naghaze yam araua kat. Tauto agham ghou tinig iza. Onoon, patañani naol tighamgham ghei. Eemoghon njar to yam aghami, tauto ipalot ghou, ve igham ghou lolog poia le poia kat.

<sup>5</sup> Sawa to nila nivot taan suruvu to Masedonia, yei irau atemai izi rita maau. Pasa, patañani naol tinjarua ghei. Yeinja tamtoghon niwazoran ghei. Ve nigham ngar naol ila lolomai, ve matughezaan tiina igham ghei. *Mbanj 20:1*

<sup>6</sup> Eemoghon Maaron toit, ye Ngeu to palotiinj yes to patañani itatan di. Tauto igham Titus inim peria tiei izi Masedonia, leso ipalot ghei ve irab atemai. *2Kor 1:3+, 2:13*

<sup>7</sup> Ve tonene moghon maau. Mbeb ite to ipalot ghei, nene vene: Sawa to Titus inim, ye ipaesia varumim payei ighaze sawa to ilat peria tiam, yam apaloti ve arab ate. Ve ipaes payei ighaze lolomim ipatañan kat pa patañani to muunj ivot ila sosood, ve akausim aghaze le aghita ghou muul, ve ngar tiam iyaryaan kat aghaze anim toman ghou pa ngar tiou. Saveenj toni tonowen igham ghou lolog poia le poia kat.

<sup>8</sup> You nawatag: Rau to nambooda ilat tiam, avaat igham gham lolomim isami ris. Eemoghon lolog ipatañan pa mbeb tonenen maau. Onoon, muunj lolog ipatañan pani. Ve aazne maau. Pasa, naghita lolomim ipatañan rismoghon, ve isob. *2Kor 2:4*

<sup>9</sup> Tauto aazne lolog poia. Eemoghon lolog poia pa lolomim to ipatañan ne maau. Lolog poia pasa, sawa to lolomim ipatañan, yam atoor ngar tiam. Ngar to lolood ipatañan pa sosor toit ve tatoor ngar toit, nene itaghon Maaron ngar toni. Tauto rau tiei tonanan iwaghamun gham maau. <sup>10</sup> Ighaze lolood ipatañan itaghon Maaron ngar toni, nene igham ghiit tatoor lolood, leso Maaron igham mulin ghiit. Ngar tovene, sei irau lolo ipatañan

pani? Maau. Eemoghon ighaze lolood ipatanan inimale yes to titaghon ngar to taan, nene pale ighereb ghiit pa mateen. *Mbo 38:18; Lu 18:13+*

<sup>11</sup> Aghita. Sawa to agham rau tiou ve lolomim ipatanan itaghon Maaron ngar toni, yam irau asanan maau. Rikia moghon ve agharaat taumim. Pasa, ngar tiam iyaryaaj aghaze apaghazonan taumim, leso you nawatag: Patanani to ivot, yam aneep ila maau. Yam amatughez pa Maaron, ve aghaze ataghon katin ngar toni. Tauto aghur atia pa ngeu to igham sosor. Ve aazne, akausim aghaze le aghita ghou muul. Ngar tiam isob tonanan ipatoon gham ighaze patanani to ivot, nene yam sosor tiam maau.

<sup>12</sup> Sawa to nambood rau tonanan payam, you naghham ngar tiina pa ngeu to igham sosor, ma tamtoghon to ye igham sosor pani ne maau.\* You naghaze yam apaghazonan taumim ila Maaron mata aghaze yam lolomim ineep tiei, ve anim toman ghei pa ngar tiei. Tauto nambood rau tonanan.

<sup>13</sup> Tovenen ngar to yam aghami, nene ipalot ghei, ve irab atemai. Ve mbeb ite. Titus ipaes payei ighaze ye lolo poia kat pasa, sawa to ye ilat, yam asob aghami toman lolomim poia. Tauto ate izi, ve igham ngar naol muul maau. Ngar tiam tonanan ipalot ghei paam, ve igham lolomai poia kat. <sup>14</sup> Muun, you nasavia varumim pa Titus ve napait gham pa ngar tiam. Saveen tiou tonowen igham ghou mayag maau. Pasa,

---

\* **7:12:** Mos waaro tonene, Paulus isavia ngeu eez to muun izoor alinja ve igham sosor. Eemoghon ye lolo pa iwaat ngeu tonowen iza ivot ighazon maau.



aliŋamai to nisavia pani pa nipait gham, nene onoon. Ye tau ighita wa. Tovenen saveeŋ tiei tonowen onoon, raraate inimale saveeŋ isob to yei nisasavia payam nene onoon moghon. <sup>15</sup> Titus paam lolo payam kat. Pasa, mata iŋgal sawa to ye ilat tiam. Yam atandag pani ve aghami toman lolomim poia, ve yam asob alooŋ aliŋa. Pasa, amatughez pa Maaron ve aghaze ataghon ŋgar toni. *2Kor 2:9*

<sup>16</sup> Tovenen aazne, you lolog poia kat. Pasa, you naghur ila ariana naghaze yam pale ataghon katin Maaron ŋgar toni.

## 8

*Paulus ipalot yes Korin ighaze tiuul tamtoghon to Krisi to tineep izi Yerusalem ve mbolaan igham di*

<sup>1</sup> Yam tonvetaz, yei nighaze yam awatag: Poia to Maaron ipamundigin lupuuŋ to Krisi to tineep izi taan suruvu to Masedonia, ve tigham ŋgar poia kat. *Ro 15:26+*

<sup>2</sup> Onoon, yes tineep ila patanani tiina lolo, ve mbolaan igham di le tineep sami kat. Eemoghon tiŋgoog yaam tiina kat pa tiuul tamtoghon to Krisi to tineep sami izi Yerusalem. Ŋgar todi tonowen, tighami toman lolodi poia. Pasa, yes matadi rein mbeb. *Mk 12:44; Ro 12:8*

<sup>3</sup> Taug naghita ŋgar todi wa. Tovenen naghaze napaes payam: Yaam to tiŋgooga pa ulaan, nene tiina kat. Tighur yaam to yes irau tighuri, ve tighur pida paam izala pogho. Taudi lolodi tighaze tigham tovene. <sup>4</sup> Pasa, ŋgar todi iyaryaan kat tighaze yes paam tighur nimadi pa ulaan Maaron

tamtoghon toni to mbolaan igham di. Tauto tino-knok ghasoniin ghei le niyok padi. *Mbanj 11:29; 2Kor 9:1+*

<sup>5</sup> Yei nighaze pa tigham ngar tonenen moghon. Eemoghon maau. Yes tighur taudi toman lolodi isob ila pa Tiina toit muun, ve tighur taudi payei paam, titaghon Maaron lolo.

<sup>6</sup> Uraat to ulaan tonene, poia to Maaron inim pughu pani, ve Titus ipamundigini ila lolomim wa. Tauto yei nisaav pani nighaze ipalot gham pani le apasobi kat. <sup>7</sup> Maaron Avuvu irei tapiri toman uraat ve ngar naol payam le araua kat. Yam aghur ila ariana, avovotia Maaron aliņa pa tamtoghon, aghazoon pa ngar toni, ve tinimim imbees pa uraat toni. Ve uraat to nighami ila lolomim, nene ipamundigin gham, tauto lolomim pa Maaron ve tamtoghon paam. Uraat to ulaan tamtoghon, nene ngar ite to poia to Maaron ipamundigin ghiit pani. Tovenen yam araua paam, ve matamim rein, ghoru poia. *1Kor 1:5, 16:1+*

<sup>8</sup> Aliņag tonene, nasavia inim tutuun payam maau. You naghaze natoov gham, leso naghita: Yam aghur lolomim pa Maaron ve tamtoghon kat, animale yes pida to tinidi imbees pa uraat tonene, ma maau? <sup>9</sup> Poia to Tiina toit Yesu Krişi, yam awatagi wa. Muun, ye irau mbep to naol. Eemoghon ipul mbep toni tonowen tisob tizi ti-neep, ve izi inim taan, ve ineep inimale ngeu mbolaana, leso iuul gham ve igham gham araua kat pa mbep to Maaron. *Mt 8:20; Pil 2:6+*

<sup>10</sup> Tovenen you naghita naghaze: Yam apasob uraat tonene le isob kat, ghoru poia. Ndaman to ila wa, lolomim ipazaagh gham pa uraat to

ulaan tonene, ve yam apamundigini muun, ghero lupuun pida titaghon gham. <sup>11</sup> Uraat to ulaan to lolomim ipamundigin gham pani, yam irau tinimim imbees pani, ve agham uraata le apasobi kat. Aghur irau to aghuri. Ighaze lemim yaam tiina, aghur tiina. Ighaze lemim tiina maau, aghur n̄giira. <sup>12</sup> Pasa ighaze iit leed mbeb eta, ve lolood taghaze tagham pa Maaron, ye pale lolo poia pani. Ve ighaze leed mbeb maau, nene poia. Maaron irau ighur mata pait pa tagham mbeb tovene pani ne maau. *Mk 12:43; 2Kor 9:7; 1Pe 4:10*

<sup>13</sup> Saveen̄ tiou tonene, ngara tovene: You naghaze yam auul tamtoghon pida tineep pooi, ve taumim aneep sami ne maau. Naghaze yam asob aneep raratemim. <sup>14</sup> Aazne, yam arau mbeb naol. Tovenen yam irau auul di pa mbolaan̄ todi. Ve muri, ighaze yes tirau mbeb pida to yam ambool padi, nene pale anadi tiuul gham. Leso yam asob aneep raratemim. *2Kor 9:12+*

<sup>15</sup> Yam irau ataghon ngar to muun̄ ivot pa yes Israela, indeen̄ sawa to tiyou aniin̄ manna. Saveen̄a timbooda pataghaan̄ tovene:

“Yes to tiyou tiina, tighan le tipasobi kat. Avodi muri rita izi maau. Ve yes to tiyou n̄giira moghon, tovene paam. Timbool maau. Tighan le apodi isun̄.” *Igham 16:18*

### *Paulus imbaan̄ ndiran tol pa tiuul yes Korin*

<sup>16</sup> You napait Maaron toman lolog poia. Pasa, ye igham Titus ighur lolo payam kat. Tauto ye ighaze iuul gham raraate inimale yei nighaze niuul gham. <sup>17</sup> Sawa to yei nighasoni pa ilat ighita gham, ye iyok pa alin̄amai. Ve tau lolo ighaze ilat ighita

gham paam. Pasa, ye ighur lolo payam kat ve ighaze iuul gham. <sup>18</sup> Ve yei pale nimbaan tonvetaz toit ite leso yesuru Titus tilat. Ngeu tonene, lupuun to Maaron tisob tipait iza pa uraat toni to votiaan varu poia. <sup>19</sup> Ve tonene moghon maau. Lupuun to Krisi tighuri leso yeina nilaagh pa uraat tonene. Uraat to ulaan tonene, poia to Maaron ipamundigini ila lolood. Ve yei nighaze nighami pa nipait Tiina toit iza, ve nipatoon taumai nighaze yei tini-mai imbees pa uraat to ulaan Maaron tamtoghon toni.

<sup>20-21</sup> Yei niwatag: Tamtoghon pale tighur yaam tiina pa tiuul yes tonvetaz toit to mbolaan igham di ne. Tovenen nighaze ningin poian yaam to nighami, ve nigham ngar to denja moghon ila Tiina toit mata ve tamtoghon matadi paam. Leso tamtoghon tiyou avodi payei sob. *Ro 12:17+; 2Kor 6:3; 1Pe 2:12*

<sup>22</sup> Ve yei pale nimbaan tonvetaz toit ite paam ilat toman ndiran ru tonowen, leso yes tol tilat tiam. Ngeu tonene, yei nighur uraat naol naol ila nima, ve nighita nighaze tini imbesmbees pa uraat to Maaron. Ye ighur ilat tiam ariana ighaze yam aghur lolomim pa uraat tonene kat, tauto ighaze iuul gham.

<sup>23</sup> Tovenen Titus, yam awatagi wa. Pasa, yeru niluplup ghei pa uraat to nighami ila lolomim. Ve tonvetaz toit ru to nasavia di payam ne, yesuru tigham lupuun to Krisi nagho ve tilat. Uraat todi toman ngar to tighamghami, nene ipait Krisi iza, ve ipatoon tapiri ve poia toni. <sup>24</sup> Tovenen sawa to yes tol tilat peria tiam, yam agham di ve apatoon ngar poia padi. Leso tiwatag tighaze yam lolomim

padi, ve lupuuŋ tisob to Kriŋi tiwatag tighaze saveeŋ to muuŋ nisavia pa nipait varumim, nene onoon.

## 9

*Paulus ipalot tamtoghon to Akaia, lesu yes paam tiŋgoog yaam pa yes Yerusalem*

<sup>1-2</sup> Yo, yam to aneep izi taan suruvu to Akaia, irau nambood saveeŋ mala payam maau. Pasa, you nawatag: Ngar tiam iyaryaŋ aghaze auul Maaron tamtoghon toni to mbolaŋ igham di. Nene inim mbesooŋ tiam ila pa Maaron. Moghon moghon, you napapait varumim pa nditaad to Masedonia. Pasa, ndaman to ila wa, yam aŋgoog yaam ve aghuri isaaŋan. Ngar tiam iyaryaŋ kat aghaze agham uraat to ulaŋ tonene, tauto ipamundigin ival tiina to Masedonia paam. <sup>3</sup> Tovenen yei nipait varumim ve nisaav padi nighaze yam aŋgoog yaam wa. Pughu tonene to naghaze nambaŋ Titus toman toŋvetaz to it ru to nasavia di ne timuuŋ tilat, lesu tiuul gham pa uraat tonene. Pa vene, saveeŋ tiei to nisavia inim paitooŋ gham inim mbeb sorok. <sup>4</sup> You naghur ila ariana naghaze yam pale agharaat mbeb inim nimamim ve isaaŋan. Eemoghon ighaze yeiŋa tamtoghon pida to Masedonia nilat, ve tighita gham agharaat mbeb sone, nene pale mayag pa aliŋag to nasavia pa napait gham, ve yam paam pale mayamim. <sup>5</sup> Matag iŋgal tovene, tauto naghaze nambaŋ toŋvetaz to it tol tonenen timuuŋ tilat. Lesu yamŋa agharaat yaam to aŋgooga itaghon saveeŋ mbuaŋ tiam, ve isaaŋan pataghaŋ. Yaam tonanan pale ipatooŋ poia to

Maaron pa tamtoghon toni. You lolog pa nalat nazoordug payam ve aghur mbeb ne maau. Naghaze agham mbeb tiina toman lolomim.

<sup>6</sup> Matamim ingal: Ighaze tamtoghon eta ivazog aniinŋ ŋgiira, nene pale sawa to taitain, ye pale ighita anona ris moghon. Ve tamtoghon to ighaze ivazog aniinŋ katindi, nene pale ighita anona katindi. *Lu 6:38; Ga 6:7+*

<sup>7</sup> Yaam piiz to tamtoghon enaena lolodi ighur pani tighaze tighuri, nene poia. Tighuri moghon. Eemoghon ighaze yam anguruut mbeb tiam, ve tizoordug payam ila ila le aghuri, nene poia maau. Pasa, Maaron lolo pa yes to tireirei mbeb todi toman lolodi poia. <sup>8</sup> Maaron, ye irau ighur poia toni tiina iza tiam ila ataam naol naol. Leso yam araua kat pa mbeb tisob irau sawa isob, ve irau agham uraat popoiadi to naol ne. *Np 28:27; Pil 4:19*

<sup>9</sup> Saveena timbooda pataghaan wa. Ighaze:

“Ngeu poia, ye ireirei mbeb toni pa yes mbolaana.

Tamtoghon tovene, ngar toni denja pale ineepp ariana itaghoni taghoni gha ila.” *Mbo 112:9*

<sup>10</sup> Yes to tivavazog aniinŋ, Maaron igham ledi aniinŋ uve. Ve ye igham aniinŋ pa iit tasob. Ye pale igham mbeb tiam tivot katindi, lesa arei katindi tila pa yes mbolaana. Ngara tovene, nene denja ila ye mata, ve ighur anona popoiadi naol. <sup>11</sup> Tovenen Maaron pale igham gham araua kat pa mbeb tisob. Leso yam irau agham ulaan pa tamtoghon irau sawa isob. Ve sawa to yei nigham mbeb tiam ila peria to yes to mbolaan igham di, yes pale lolodi poia pa

Maaron, ve tipaiti pa ulaan to yam agham padi.

<sup>12</sup> Uraat tonene, yam aghami inim mbesoon tiam ila pa Maaron. Ulaan tiam pale ipasob mbo-laan to tamtoghon toni. Ve tonene moghon maau. Pale igham ival tiina lolodi poia pa Maaron, ve tipaiti kat pa poia toni paam. *2Kor 4:15, 8:14*

<sup>13</sup> Ngar tiam to aghaze arei mbeb tiam, ve asangoor ulaan pida ila pa yes mbolaanja, nene ipatoon gham ighaze yam aghur ila varu poia to Krisi, ve ataghon aliija. Tovenen tamtoghon to tigham ulaan ilat tiam, pale tipait Maaron iza pa tapiri ve poia toni. <sup>14</sup> Ve lolodi ineep tiam, ve matadi ingal gham ila sunuun todi. Pasa, tighita poia tiina to Maaron ineep tiam.

<sup>15</sup> Iit lolood poia pa Maaron ve tapaiti! Pasa, ye igham leed mbeb to poia le poia kat. Ighaze tasavia mbeb tonowen, pale tasaav vena? Pasa, saveen eta iraua maau. *Yo 3:16; 1Pe 1:8-9*

## 10

*Paulus ipamuul saveen ngaliin to tamtoghon pida*

<sup>1</sup> Tamtoghon pida tingalngal saveen payou tighaze sawa to naneep toman gham, you namatughez ve nasasavia saveen popoia moghon payam. Ve ighaze naneep sagan payam, nene napakur taug ve avog iyaryaan payam. Tovenen you Paulus naghaze napalot gham pa saveen pida. Saveen to naghaze nasavia, nene nasavia toman ngar luuma ve ngar to natatan taug inimale Krisi itaghooni. *Mt 11:29; 1Kor 2:3; Pil 2:5+*

<sup>2</sup> You nawatag: Ndiran tonowen tighaze yei nitaghon Maaron ngar toni maau. Tighaze nitaghon ngar to tamtoghon moghon. Yes irau tipatum di. Pasa ighaze nilat, nene irau namatughez padi maau. Pale nayaan di toman saveen ariana. Eemoghon lolog pa naghham ngar tovene maau. Tovenen nataj roran gham naghaze agharaat ngar tiam. *1Kor 4:21*

<sup>3</sup> Onoon, aazne yei nineep izi taan. Eemoghon niparab ninimale yes to titaghon ngar to taan maau. <sup>4</sup> Pasa, ndaab to malmal to yei niparab pani, nene to taan maau. Nene ndaab to Maaron igham payei, ve ye tau tapiri ineep ila. Tauto ruum ariana di to koiamai tiyonjooj ila lolodi, nene yei irau nireu mbirisan di tizi. *2Kor 6:7; Ep 6:13+; 1Tim 1:18*

<sup>5</sup> Ndiran pida tipapait taudi pa ngar todi, ve avodi iyaryaan pa ngar kaarom naol to iponpoon ataam pa yes to tighaze tiwatag Maaron. Ndiran tovene, yei nireureu ngar ve saveen kaarom todi isob. Ve nitatan ngar todi samsamia, ve nigham ngar todi isob imuul ila pa Krisi. Leso titaghon ngar toni, ve tineep ila samba. *1Kor 1:19*

<sup>6</sup> Yei nighur matamai ilat tiam moghon. Ighaze yam alooj alinamai ve ataghon saveen tiei, nene yei pale nighur atia pa tamtoghon tisob to tizor-zoor saveen.

<sup>7</sup> Alooj. Yam angabiiz mbep to potla moghon malep. Angabiiz poian lolo toni paam. Ighaze tamtoghon eta igham ngar ighaze ye to Krisi, pale iwatag ighaze yei paam to Krisi, ve Krisi tau to ighur ghei pa uraat toni. *Yo 7:24; 2Kor 11:23; 1Yo 4:6*



<sup>8</sup> Onoon, saveen tiou tonene, nene inimale napait izamai pa uraat to nighamghami Eemoghon mayag maau. Pasa, yei izamai pa uraat tonene. Tiina toit ighur ghei pa uraat tonene pa niwaghamun gham maau. Ye ighaze nipalot gham. *2Kor 13:10*

<sup>9</sup> Tovenen agham ngar aghaze rau to nambood di tilat tiam, nene pa napamatughezan gham malep.

<sup>10</sup> Ndiran to nasavia di ne, tisavia ghou tighaze: “Saveen to ye imbooda ila rau, nene ariana ve toman tapiri. Eemoghon ighaze tau inim peria, nene taghita taghaze ye le tapiri maau, ve iwaghamgham pa savsaveen. Saveen toni anona maau.” <sup>11</sup> Ndiran tonenen irau tigham ngar pooi. Pasa, saveen to nineep sagan ve nimbooda payam, ighaze nilat ve itina taneep, nene pale nitaghon saveen tonowen ngara. *2Kor 13:2*

*Paulus ighaze ye le iza pa igham uraat izi Korin*

<sup>12</sup> Yei ninimale ndiran pida maau. Yes tilib payei kat. Pasa, ngar to tighamghami, yei irau nighami maau. Yei mayamai pa nipait taumai izamai. Eemoghon yes mayadi pa tigham ngar tovene maau. Tighaze yes tiraua kat. Pasa, sawa to tingabiiz taudi, tigham ngar pa Maaron aliya maau. Tingabiiz taudi toman nditadi ngar todi. Ndiran tovene, ledi ngar maau. *Lu 18:9-14*

<sup>13</sup> Yei irau nipait taumai sorok ninimale ndiran tonenen maau. Ighaze nipait taumai, nene nisavia uraat to nighami izi ndug to Maaron ighuri payei. Ndug tonenen, yam Korin aneep ila paam. Ve ndug to ighaze lemai izamai pa

nigham uraat pani maau, nene irau nimalaan ve nila nigham uraat tonowe maau. *Ro 12:3, 15:18*

<sup>14</sup> Ndug to Maaron ighuri payei pa nigham uraat pani, yei nimalaan pani maau. Yam Korin aneep iloon ila paam. Ve yei to nilat ve nivotia varu poia to Krisi payam muun. Tovenen yei izamai pa nigham uraat ila lolomim. *1Kor 3:5*

<sup>15</sup> Yei nipait ghei pa uraat to tamtoghon pida tighami ne maau. Uraat to taumai nighami izi ndug to Maaron ighuri payei pa nigham uraat pani, ghoru nipait ghei pani. Uraat to nighamghami ila lolomim pa nipalot ghurla tiam, yei nighaze ivot inim tiina. <sup>16</sup> Leso inim ataam payei pa nivotia varu poia izi ndug pida to tineep ndug tiam dige ve ila. Pasa, lolomai pa nipait ghei pa uraat to tamtoghon ite ighami ne maau. Nighaze le nila ndug to tamtoghon tigham uraat padi sone, ghoru poia. *Ro 15:20*

<sup>17</sup> Maaron aliņa isaav tovene:

“Tamtoghon to lolo pa ngar to pakuruun, ye irau ipakur Ngeu Tiina pa ngar to ye ighami.” *Yer 9:23+; 1Kor 1:31*

<sup>18</sup> Ighaze tamtoghon eta ipait tau, nene takankaan: Maaron lolo poia pani, ma maau? Ve ighaze Maaron tau ipait tamtoghon eta, nene tawatag taghaze ye lolo poia pani. *Ro 2:29; 1Kor 4:4+*

## 11

*Paulus iveivei pa yes Korin pa mbanõõña kaaromña*

<sup>1</sup> You naghaze naghama ngar to borouña ris. Vena, irau ayok payou? <sup>2</sup> Aghita. You nasia gham

pa Kriſi wa. Tovenen űgar tiou iyaryaany naghaze le űgar tiam isob iűgalaany moghon, ve naghur gham ala toni, animale liva paghu to tighuri ila to tamoot, leso yesuru tivai. Pasa, Maaron űgar toni iyaryaany ighaze tamtoghon toni tighur lolodi ve űgar todi isob ila pani moghon. *Ep 5:27; Kol 1:28; Syg 14:4*

<sup>3</sup> Aazne, yam ataghon űgar űgalaanya ve aghur lolomim isob iűarua Kriſi. Eemoghon namatughez: Pale tamtoghon pida tighamun űgar tiam, inimale muuny moot igham kaarom pa Eva ve itombaana, ghoru apul űgar tonanan. *Mbnp 3:1+; 2Pe 3:17*

<sup>4</sup> Pasa, you nawatag: Tamtoghon pida tilat ti-neep toman gham, ve saveeny to tivovotia pa Yesu, nene raraate inimale saveeny to muuny yei nisavia payam ne maau. Ve avuvu to yes tighaze yam aghami, nene raraate inimale Maaron Avuvu to muuny aghami ne maau. Ve varu poia to tivovotia payam ne paam, nene raraate inimale varu poia to yei nisavia payam ve aghur ila ne maau. Eemoghon yam agham di toman lolomim poia, ve apul di tigham uraat todi tonanan, ve aghur ila saveeny todi. *Ga 1:6+*

<sup>5</sup> Aloony. Mbanooűa pida to yam aghita di aghaze izadi tintina, yes tilib payou maau. Sa űgar to yes tighami, you naghami paam. *1Kor 15:10; 2Kor 12:11; Ga 2:6+*

<sup>6</sup> Onoon, you űgeu to savsaveeny nanimale yes maau. Eemoghon űgar to Maaron, you nambool pani maau. Sawa naol, űgar naol to naghams di ne, tipatoony ghou ila matamim tighaze you naghazoon pa Maaron űgar toni. *1Kor 1:17, 2:1,13; Ep*

## 3:4

<sup>7</sup> Yam awatag: Sawa to navotia varu poia to Maaron payam, natatan taug, ve naghām uraat payam sorok. Nayok pa agham leg atia maau. You nataghon ataam tovene pa napakur gham. Laak, yam aghita vena? You nasosor? [1Kor 9:12+](#)

<sup>8</sup> Sawa tonenen, you naneep ila lupuun pida to Krisi nimadi. Ulaan to tigham payou, nene iuul ghou ve naghām uraat payam. Ngar tonenen, nene inimale you nayub mbeb todi, leso naghām payam. <sup>9</sup> Sawa to itina tanepneep ve mbolaan igham ghou, you naghason gham pa ulaan eta maau. Pasa, tonvetaz pida to Masedonia tinim, ve tiuul ghou pa mbeb to nambool pani. Ve lolog pa naghām patajani eta payam maau. Tauto nayai ghou, ve naghason gham pa ulaan eta maau. Ve aazne ve itaghoni ila paam, pale nataghon ngar raraate moghon. [2Kor 12:13; Pil 4:15+; 1Tes 2:9](#)

<sup>10</sup> Aloon. Saveen onoon to Krisi ineep tiou, ve ye tau ighita ghou ve nasavia saveen tonene. Yam tamtoghon to Akaia, tiam eta irau igham ghou napul ataam to nataghoni pa uraat tiou ne maau. Pasa, ataam tonene to igham ghou tinig iza ve napakur ghou pani. <sup>11</sup> Vena, yam aghaze you lolog payam maau, tauto nataghon ataam tovene? Maaron iwatag: You lolog payam kat. <sup>12</sup> Tovenen irau nayok payam pa auul ghou ne maau. Ataam to nataghoni pa uraat tiou, nene pale inepneep tovene. Pasa, naghaze napoon ataam pa yes to tipapait taudi izadi tighaze yes raratedi tinimale yei.

*Ngar to mbanjoona kaaromna tighamghami*

<sup>13</sup> Ndiran tonowen, tigham taudi tinimale mbanjoona to Krisi. Eemoghon yes mbanjoona to Krisi maau! Tigham kaarom. *Mt 7:15+; Mbanj 20:29+; 2Kor 2:17*

<sup>14</sup> Ve iit irau runaad iza pa kaarom todi tonowen maau. Pasa, Sadan paam irau igham tau inimale anela to ipatoon ghazoonja to Maaron, leso ito-mbaan ghiit. *Ga*

*1:8*

<sup>15</sup> Tovenen mbesoonja toni paam, irau tigham taudi tinimale ndiran to titaghon ngar denja. Eemoghon runaad iza padi malep. Muri, Maaron pale ighur atia injarua di pa ngar todi.

*Patajani naol to Paulus imbaad di, tauto tipatoonja tighaze ye mbanjoona to Krisi*

<sup>16</sup> You nasaav wa. Naghaze nasavia saveen ris inimale borouja. Eemoghon tiam eta ighita ghou nanimale borou malep. Ve ighaze aghita ghou nanimale borou, nene poia! Apul ghou ve naghama ngar to borouja, ve napait taug izag ris.

<sup>17</sup> You nawatag: Saveen to naghaze nasavia pa napait taug, nene itaghon ngar to Tiina toit maau. Saveen to naghaze nasavia, nene inimale saveen to yes borouja to ledi ngar maau. <sup>18</sup> Ve tambaja. Pasa, tamtooghon katindi to yamja anepneep, yes titaghon ngar to taan ve tipapait taudi izadi. Tovenen you paam, anag naghaze napait taug.

<sup>19</sup> Aa yam Korin, yam araua kat pa ngar! Tauto yes to ledi ngar maau tinimale borouja, yam lolomim poia padi, ve lolomim pa lonjaan saveen todi! <sup>20</sup> Ve tonene moghon maau. Pasa, ighaze tamtooghon eta itatan gham ve izoorndug payam

pa ataghon ngar toni moghon, ma iyou mbeb tiam tisob tinim le, ma igham mbeb tiam dige ee moghon, ma ipait tau, ma ipambar gham ve ipamayanin gham, yam ayok pani moghon, ve apuli ighamgham tovene. <sup>21</sup> Ndiran tonanan tilib payei kat! Tigham ghei mayamai. Pasa, ngar to tighamghami, yei irau nitaghoni maau.

Yo, naghaze naseen saveen tiou borou tonene. Pasa, ndiran pida to tineep toman gham, mayadi maau ve tipapait taudi izadi. Tovenen you pale nataghon ngar todi ve napait taug izag paam! *2Kor 10:10*

<sup>22</sup> Vena, ndiran tonanan yes Hibrua? You paam to Hibu. Ve yes to Israel? You paam to Israel. Ve yes tivot ila to Abaram? You paam navot ila to Abaram.\* *Mbanj 22:3; Ro 11:1; Pil 3:4+*

<sup>23</sup> Ve yes mbesoonja to Kresi? You paam, mbesoonja toni. Eemoghon you nalib padi. Alinag tonene, you nawatag, nene saveen to borouja. Eemoghon tambanja! You narab taug pa uraat to Kresi le nalib padi. Ve tilos ghou le nasami pae katindi. Sawa naol, tighur ghou naloon nala ruum to yabyabuun. Ve moghon moghon, naghita naghaze sawa tiou to mateen inim igharau. Patanani naol to nambaad di, nene nalib pa ndiran tonanan. *1Kor 4:9+; 2Kor 4:11, 6:4+*

---

\* **11:22:** Saveen 'Hibrua' ve 'Israela,' pughudi raraate maau. Hibrua, nene Abaram papaghu toni. Ve saveen 'Israela,' nene injarua ghurla todi. Yes to Maaron igham di tinim le, ve titaghon tutuun toni, tiwaat taudi tighaze yes Israela. Ve ndug ndug tiwaat di tighaze 'Yuda.'

<sup>24</sup> Daba to yes Yuda tilos ghou pa ravraav pa liim wa. Ve sawa enjaena to tilos ghou, tilos ghou pa tamoot ee saangul liim ve paan (39).† *Lo 25:3*

<sup>25</sup> Yes Roma tigham toon ve tilos ghou pae tol wa. Ve sawa eez, ival tikor yaam ve tirab matin ghou. Sawa tol, you naza waan ve niraav nila le waan imbiris ila te pogho. Ve sawa eez, namoghan ila te pogho pa mbonj eez, ve ndag eez. *Mbanj 14:19, 16:22+, 27:41*

<sup>26</sup> Sawa naol to nalaghlaagh, patanani naol tinjarua ghou ve rismoghon tone namaat. Yawaanja ivot toman tapiri le rismoghon izugua ghou nalaleg. Moghon moghon yubyubna, ve yes Yuda to yeina ndug ee moghon, ve yes to Yuda maau ne paam tizuaria di tighaze tiwaghamun ghou. Tovenen ighaze naneep ila ndug tintina, ma nalaghlaagh izi ndug balim, ma naza waan ve naraav ila te pogho, nene patanani ighamgham ghou tovene. Ve tamtoghon to titoom ve tigham taudi tinimale tonvetaz to Kresi, yes tigham patanani tiina payou paam. *Mbanj 9:23, 13:50, 20:3, 23:12+*

<sup>27</sup> Moghon moghon, you narabrab taug pa uraat, ve nagheen pooi maau. Ve sawa naol, naneep sami, ve murun ghou ve pitool ghou. Ag aniij maau. Ve monjanan ighamgham ghou pasa, leg nonogiiina poia eta to nandud ghou pani maau. *Mbanj 20:31; 2Kor 6:5*

<sup>28</sup> Patanani naol tonowen, to tinig moghon. Ve mbeb ite paam ighamgham patanani payou. Pasa,

---

† **11:24:** Tutuunj to Mose isaav tovene: Ighaze tilos tamtoghon eta, yes irau tilosi pa tamoot ru (40) ve izi. Irau timalaan pa 40 ve izala maau. Tovenen sawa to yes Yuda tilos Paulus, tingal mata kat.

sawa isob, you naghhamgham n̄gar naol pa lupuun tisob to Krisi, ve lolog imbumbu padi. <sup>29</sup> Ighaze tamtoghon eta ghurla toni iyaryaan̄ maau, nene igham ghou nayamaan taug naghaze tapirig isob. Ve ighaze tiweu toit eta ve igham sosor, nene igham ghou ateg yabyab kat.

<sup>30</sup> Ighaze n̄gar tiam iyaryaan̄ aghaze napait taug, nene poia. You pale nataghon n̄gar tiam. Eemoghon sawa to napait ghou, you pale nasavia mbeb pida to tipatoon̄ ghou tighaze you tapirig imbool. *2Kor 12:5,9+*

<sup>31</sup> Tiina toit Yesu Krisi Tama Maaron, iit irau tapait iza irau sawa isob. Ye iwatag: Saveen̄ tiou tonene, kaarom maau. Onoon moghon. *Ro 1:9+; 2Kor 1:23*

<sup>32</sup> Sawa to naneep izi ndug tiina Damaskus, gavana to kinik Aretas ighuri inim n̄giniin̄ pa ndug tonowen, ye ighur ndaaba pida pa tingin̄ ataam to ndug, leso tikis ghou. <sup>33</sup> Eemoghon nditag pida tizeev ghou nala nakaral tiina lolo, ve tigham ghou nila pa marai saambu to ineep ila didiin̄ tiina to ndug dige, ve titug ghou nazi nala. Tauto ye ikis ghou maau, ve naghau nala. *Mban̄ 9:23+*

## 12

### *Paulus isavia tandagiin̄ toni*

<sup>1</sup> Onoon, you naghita naghaze n̄gar to tapait tauud izaad, nene iuul ghiit maau. Eemoghon leg ataam ite paam maau pasa, yam lolomim pa n̄gar tovene. Tauto you pale naseen̄ saveen̄ tiou, ve nasavia mbeb pida to Tiina toit Yesu ivotia di payou ila tandagiin̄. <sup>2</sup> You nawatag n̄geu eez to



Krisi. Ndaman saangul ve paan to ila wa, Maaron iiti iza ila sambam to sala le sala kat.\*

Ve you nawatag maau. Ngeu tonowen tau iza ila ve ighita pa mata, ma itandag moghon? Maaron moghon to iwatag. <sup>3-4</sup> Tovenen ngeu tonenen, Maaron iiti iza ila ndug toni to paghuna le paghuna kat. Ve nasaav muul. Nawatag maau. Ngeu tonenen tau iza ila ve ighita pa mata, ma itandag moghon? Maaron moghon to iwatag. Sawa to ineep tonowe, ye iloon saveen to mbeb pida. Mbeb tonowen, ighaze tatoova pa tasavia di, nene pale taraua maau. Pasa, saveen eta irau ivotia mbeb tonowen tighazon maau. Ve mbeb ite. Mbeb tonowen, ledi ngalsekiin. Tamtoghon eta to taan irau ivotia di maau. <sup>5</sup> Ngeu to mbeb tonowen ivot pani, you irau napaiti. Eemoghon irau napait taug maau. You naghaze nasavia mbeb pida to tipatoon ghou tighaze tapirig imbool. Mbeb tonene moghon to napait ghou padi.

*2Kor 11:30*

<sup>6</sup> Tovenen you lolog pa napait taug maau. Eemoghon ighaze naghams tovene, nene pale naghams ngar to borouja maau. Pasa, saveen to nasavia pa napait taug, nene onoon. Eemoghon lolog pa ngar tovene maau. Pasa, lolog pa tamtoghon tipait izag sorok malep. Naghaze

---

\* **12:2:** Saveen waaro tonene, Paulus isavia tau. Ye lolo pa ipait tau maau. Tauto iwaat tau iza maau, ve ighuri iza to ngeu ite. Saveen to Paulus imbooda, isaav tovene: "iza ila sambam to inim tol pani." Yes Israela ngar todi tovene: Sambam tol tinepneep. Eez, nene soso to man tirovroov ila. Ite inim ru, nene soso to ndag, kaiyo ve pitum tineep ila. Ve inim tol pani to ineep sala le sala kat, nene ndug sambam to Maaron ineep pani.

tighita n̄gar to naghami ne, ve tiloon saveen̄ tiou. Ve ighaze tighita gabuag ve tipait ghou, nene poia.

*Sawa to tapiriid imbool, Krisi ipapalot ghiit, leso tayoon ariana*

<sup>7</sup> Maaron ivotia mbeb popoia katindi payou. Eemoghon ye lolo pa napait taug pa n̄gar to igham payou ne malep. Tauto ipul Sadan iwaghamun ghou pa patanani eez to tinig. Patanani to ighamgham ghou, nene inimale mban̄oon̄a to Sadan. Ingalngal ghou inimale waar mata mata, leso napait taug kat sob. *Ga 4:13+*

<sup>8</sup> Patanani tonene, you naghason Tiina toit pae tol naghaze ipaghaua ighau payou. <sup>9</sup> Eemoghon ye isaav payou ighaze: “Maau. Poia tiou to izaza tiom, nene iraua. Ukaal sa mbeb muul? Yes to tapiridi imbool, nene you irau napatoon tapirig ivot ighazon̄ kat ila todi.” Tovenen ighaze tapirig imbool, nene tinig iza, ve napakur ghou. Pasa, sawa to taug tapirig imbool, nene Krisi tapiri tiina ineep tiou. *2Kor 11:30; Pil 4:11+*

<sup>10</sup> Tovenen ighaze tapirig imbool, ve tamtoghon tipamayan̄in ghou, ve tigham samin ghou, ve tighur patanani payou, nene lolog poia. Pasa, sawa to tapirig imbool, Krisi ipapalot ghou pa tau tapiri. Tauto nayoon ariana. *Ro 5:3; 2Kor 13:4*

*Paulus igham n̄gar naol pa yes Korin*

<sup>11</sup> Wais, yam Korin agham ghou nasavia saveen̄ to boroun̄a wa. Inimale yam apait ghou pa uraat tiou, tone poia. Eemoghon yam agham tovene maau. Onoon, you n̄geu sorok. Eemoghon yes mban̄oon̄a to yam aghita di aghaze izadi tintina,

yeiņa raratema. Sa nğar to yes tighami, nene you naghami paam. *2Kor 11:5*

<sup>12</sup> Nğar ve uraat to naghami ila lolomim, nene ipatooŋ ghou ighaze you mbaŋooŋa tau to Krisi. Pasa, nayoon ariana pa badooŋ patañani, ve Maaron ipalot ghou ve naghām mbēb gharatooŋadi ve uraat tintina tivotvot. Tauto ipatooŋ ghou ighaze ye ineep toman ghou pa uraat tiou. *Mk 16:17+; Ro 15:19*

<sup>13</sup> Laak, you naghām sa sosor payam? Nğar ee moghon to naghām payam, to ite ris pa nğar to naghām pa lupuuŋ pida to Krisi. Nene nayok pa aghām leg atia maau. Naghām tovene pasa, lolog pa naghām patañani payam maau. Ighaze yam aghita aghaze nğar tiou tonenen deŋia maau, ghorō apul sosor tiou! *2Kor 11:9*

<sup>14</sup> You nangig gham pae ru wa. Ve aazne, matag iŋgal naghaze nalat naghita gham muul inim pae tol. Ve irau naghām patañani eta payam maau. Pasa, lolog pa naghām mbēb tiam maau. You naghām nğar pa yam taumim. Naghaze lolomim inim tiou, ghorō poia. Aghita. Ndipain tindou mbēb pa tiuul nditamandi ve nditinandi? Maau. Yes tineep ila nditamandi ve nditinandi nimadi. *2Kor 13:1*

<sup>15</sup> Tovenen ighaze you narei taug toman mbēb tiou pa nauul gham, nene lolog poia moghon. Ma vena? Nğar tiou to lolog payam kat, tauto ighām gham lolomim payou kat maau ne? *Pil 2:17; 1Tes 2:8*

<sup>16</sup> Tovenen you lolog pa naghām patañani payam maau. Tauto nayok pa aghām leg atia maau. Yo, saveeŋ tonene imuul sualen. Tala kat

sob.

You nawatag: Ndiran pida to tineep toman gham, tingal saveeņ payou tighaze: “Ngeu tonowen, ye iraua kat pa kaarom. Onoon, ye iyok pa tagham le atia maau. Eemoghon inim itombaan ghiit, ve iyou yaam to tanġooga pa ulaaņ ne, ve ighami inim le!” <sup>17</sup> Saveeņ todi tonowen, you nakankaan pani. Yes to nambaan di tilat tiam, todi eta inim ataam payou pa natombaan gham ve nayau mbeb tiam? Maau. <sup>18</sup> Onoon, you to napalot Titus naghaze ilat. Ve nambaan toņvetaz toit ite ilat tomani. Vena, Titus itombaan gham ve iyou mbeb tiam? Yam awatag: Ye irau igham ŋgar tovene maau. Ve yeru Titus, ŋgar tiei ve gabuamai raraate. *2Kor 8:6, 8:16+*

*Ngar pida to yes Korin to Paulus lolo pa ighita maau*

<sup>19</sup> Vena, yam aghaze saveeņ to nimbooda ila rau tonene, nene pa nipoon taumai? Maau. Yei nisavia saveeņ tonene ila Maaron mata itaghon Kriŋi ŋgar toni. Pasa, yei nineep ila to Kriŋi. Yam toņvetaz, lolomai payam kat. Tovenen ŋgar isob to nighami ne, nene pa iuul gham ve ipalot gham. <sup>20</sup> Eemoghon you namatughez: Sawa to ighaze nalat, pale naghita ŋgar tiam le irau lolog maau. Ve ighaze tovene, nene pale nayaan gham, ve naghām ŋgar to irau lolomim maau. Pasa, matag inġal naghaze sawa to nalat, you pale naghita gham aghamgham ŋgar samsamia naol tovene: Awazoran gham, ve avalag gham aneep lemim lemim, ve ŋgar tiam iyaryaņ aghaze atatan nditamim ve agham di titaghon ŋgar tiam moghon. Ve atemim yabyab, agham ŋgar pa taumim moghon,

anjalngal saveen pa nditamim, anin avomim padi, apapait taumim izamim, ve aghamgham ngar samsamia pida paam to tireureu lupuun tiam.

*1Kor 4:21; 2Kor 10:2*

<sup>21</sup> Ve namatughez pa mbeb ite paam: Ighaze namuul nalat, ve naghita gham agharaat taumim sone, nene pale Maaron ipamayanin ghou ila matamim. Ghorololog ipatanan ve natan pa ival tiina to tigham sosor, ve titoor ngar todi sone. Nene nasavia yes to ngar todi ingalaan maau, ve matadi samia tinimale ngavuun, ve tila pa naghodi moghon ve tighamgham ngar samsamia naol.

*2Kor 13:2*

## 13

### *Tangabiiz poian tauud pa ghurla toit*

<sup>1</sup> You nalat naghita gham pae ru wa. Ve aazne, naghaze naghama laghoon tiou ite muul inim tol. Leso nawatag katin ngar tiam. Pasa, Maaron alina isaav tovene:

“Tamtoghon ru ma tol irau tighita mbeb pa taudi matadi ve tipariaan saveena, ghorotaghur ila taghaze nene onoon.” *Lo 17:6*

<sup>2</sup> Sawa to nalat naneep toman gham inim pae ru, you nasaav ariana payam naghaze apatum gham pa ngar to aghamghami. Ve aazne, naneep mala, ve nasaav muul. Ighaze namuul nalat, ve naghita yes to muun tigham sosor titoor ngar todi sone, nene irau naghurghur di maau. Pale naghur patanani padi. Ve yes moghon maau. Tamtoghon pida to aazne tighamgham sosor ne paam, irau naghurghur di maau. <sup>3</sup> Aazne, ngar tiam iyaryaan aghaze le aghita mbeb eta inim

ghilaloon payam. Leso awatag aghaze you navotia Krisi alija payam. Tovenen yam pale aghita. Eemoghon Krisi tapiri ineep sagan payam maau. Ye ighamgham uraat ila lolomim toman tapiri tiina. Ve yam aghilaala maau. <sup>4</sup> Onoon, sawa to Krisi imaat izala ai pambaroon, tamtoghon tighita tighaze ye le tapiri maau. Eemoghon Maaron tapiri ipamundigini pa mateen, ve aazne ye ineep mata iyaryaar. Yei tovene paam. Tapirimai imbool. Eemoghon nineep ila to Krisi, tauto Maaron tapiri ipapalot ghei pa uraat tiei, lesu niuul gham. *2Kor 12:9; Pil 2:7+*

<sup>5</sup> Angabiiz poian taumim: Ngar to aghamghami ne, ipatoon gham ighaze yam aghur ila, ma maau? Ve yam irau aghilaal aghaze Krisi ineep ila lolomim, ma maau? Anumeer taumim sorok malep. Pa vene, aghur ila maau ma venen. <sup>6</sup> Ve yei nighur ila tovene: Ighaze angabiiz ghei, nene pale aghilaal ghei aghaze yei mbanjoona tau to Krisi. <sup>7</sup> Yei nighason Maaron pa ipalot gham, lesu agham ngar samia muul sob. Pasa, nighaze le ngar tiam isob denja ila ye mata. Ve ighaze tamtoghon tingabiiz ghei tighaze yei mbanjoona tau to Krisi, ma tighaze yei nigham kaarom pa uraat tiei, nene mbeb sorok. Eemoghon yam irau ataghon katin ngar denja, ghoru agham ghei lolomai poia. <sup>8</sup> Pasa, yei irau nizoor saveen onoon maau. Yei nineep pa nipariaana. <sup>9</sup> Tovenen ighaze tamtoghon tighita ghei tighaze tapirimai imbool, nene poia. Eemoghon nighaze yam ayoon ariana pa ghurla tiam, ghoru lolomai poia. Tauto sawa isob, nighurghur gham ila sunuun tiei, ve nighason Maaron pa igham uraat payam le ngar tiam

isob denja moghon ila mata.

<sup>10</sup> Saveeñ tonene, aazne naneep saguan ve nambooda ilat tiam. Pasa, lolog pa nalat ve naghamsaveeñ ariana payam maau. Onoon, Tiina toit ighur gham ila sambag. Eemoghon ye lolo pa nawaghmun tamtoghon malep. Ye ighur ghou pa uraat tonene, leso napalot tamtoghon, ve ghurla todi ivot inim tiina ve iyaryaan. *1Kor 4:21; 2Kor 2:3, 10:2,8*

<sup>11</sup> Yam tonvetaz, naghaze napasob saveeñ tiou. Yam asob alooñ saveeñ palotiñ tiou tonene, ve lolomim poia, agharaat ñgar tiam, alup lolomim inim ee moghon, ve ataghon ñgar luuma. Leso Maaron to lolo ineep toit, ve igham ghiit taneep poia toman lolood luuma, ineep toman gham. *Ro 15:33; Pil 2:12, 3:1; 1Tes 5:16*

<sup>12</sup> Tovenen lolomim poia pa taumim, ve awakisin nimamim\* itaghon ñgar to iit tamtoghon to Maaron. *Ro 16:16*

<sup>13</sup> Maaron tamtoghon toni to tineep sualen, tigham ndag poia todi ilat.

<sup>14</sup> Poia to Tiina toit Yesu Krisi iza to yam asob, ve ñgar to Tamaan Maaron to lolo ineep toit ne ineep toman gham, ve Avuvu Patabuan ilup gham anim ee moghon. Onoon.

---

\* **13:12:** Paulus imbood saveeñ tovene: 'Aghan avomim.' Nene ataam todi to tipatoñ tighaze lolodi pa taudi. Ve iit tagham tovene maau. Tayanin pa tamtoghon, ve itinja tawakisin nimaad.

**Maaron Saveen Toni Patabuan**  
**The New Testament and portions of the Old Testament**  
**in the Oov Dialect of the Saveeng language of Papua**  
**New Guinea. The Saveeng language is also called Mutu**  
**or Mutu-Tuam.**

**Sampela hap Buk Baibel long tokples Saveeng Oov**  
**long Niugini**

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 11 Nov 2022 from source files dated 9 Oct 2020

c7a45d99-91a2-564f-9c55-d2efc8be7fae